

Regional News Unit AIR Aizawl
Wednesday, June 12, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Chief Minister Pu Lalduhoman ramchhung leh pawna awmpui hna thawk tura mi thawnchhuak thin placement agency, dan phalloha din te liscence cancel sak vek an ni tawh a ti.
- Mizoram IGP Pu Lalbiakthanga Khiangte chuan dan zam thar criminal law pathum te chu Mizorama hman a nih vat theihna'n theihtawp an chhuah a ti.
- Telegu Desam Party Chief Nara Chandrababu Naidu chua Andhra Pradesh Chief Minister atan vawiinah lakluh a ni dawn.
- Senior BJP leader Mohan Charan Majhi chu Odisha Chief Minister thar a ni dawn



CM

Chief Minister Pu Lalduhoman ramchhung leh pawna awmpui hna thawk tura mi thawnchhuak thin placement agency, dan phalloha din te liscence cancel sak vek an ni tawh a ti.

Nimina Aizawla Mizoram Private Placement Agency pakhat Zofa Agency a hawnaah he thu hi sawiin Chief Minister chuan, state economy a that loh avangin hna hmulo an tam a, competition examah an tling hlei thei si lova, hna hnuaihngung zawk thlenga dap a ngai a. Thingtlangah hna a vang zual a, hna zawngin khawpuiah thalaite an lut a, an beisei ang an hmu vek si lova. Hei hi hriain ram pawnah hna an thawh theih nan Mizoram sawrkar chuan kum 2015 khan Mizoram Private Placement Agencies (Regulation) Act, 2015 a siam ta a. Chu Act ah chuan beyond the boundaries of Mizoram tih hmun hnihah ziah lan a ni. Chu dan hmang chuan Agency 27 hnenah phalna pek an ni zui ta a. Kha dan kha Mizoram sorkar thuneihna piah lam thil a ni tih hria an awm lova, kalpui a ni ta a, harsatna an tawk a, a lo lang fiah ta a ni, a ti.

Hetihlai hian Agency te pawhin kawng dangin dan an lo bawhchhe ve bawk tih sawiin Women Commission ten thubuai an thelut a, nikum lamah mi 29 te man an ni a. Bail theih a nih avangin bail an ni a, Investigation tih vek tawh a ni. A hremna lam hi Mizoram sawrkarin prosecution sanction a tithei lova kumin January thla khan sawrkar laipuih an dil a. Vawiin thlengin a chhanna an la nghak mek a. An sawrkar veleh khan heng licence te hi an cancel ta vek a, tumah licence nei an awm tawh lo a ti.

Chief Minister chuan ram danga zofa awm te huikhawm tul an tih avangin Zo Diaspora Cell an din a, CM office atangin an function dawn tih sawiin Agency chungchanga tun hnaia sawrkar hmalakna a tarlang a. Heng Agency thua an harsatna te sutkian theihna awm chhun chu sawrkar laipui atanga dan ang thlapa Licence neih a ni a. Ti thei awm chhun Zofa Agency an awm ta chu a lawmawm hle a ni a ti.

Chief Minister hian, Mizo thalaite chu ram danga hna sang leh zahawm tak tak te pawh thawk thei tura inbuatsaih tura fuihin, skill development uar turin a chah a, Taiwan, United Kingdom leh South India lam tea Mizo thalaiten hna an thawh theih dan tur an dap mek thu te pawh a tarlang a ni.

Zofa Agency hi thianho parukin an din a ni a, Kkumin January ni 30 khan phalna an hmu a, March thlaah Protector of Emigrants in an rawn tlawh a, branch panga dang dil leh turin thurawn an pe a. Anni hian dil zui nghalin branch panga approval hi an nghak mek a ni. An hnuaiia kal te insurance tur pawh cheng nuaih 50 an dah a, kawng him leh dan hnuaiiah zel chauh kal an tum a ni.

Anni ang Ministry of External Affairs (MEA) phalna nei Agency hi India hmarchhak bialah pali an awm mek a ni.

<><><>

AMC OPP PRESS CONF

Mizoram IGP Pu Lalbiakthanga Khiangte chuan ramchhunga hman tur hnuchhuina atana dan zam thar criminal law pathum te chu Mizorama hman a nih vat theihna'n theihtawp an chhuah thu a sawi.

Pu Lalbiakthanga Khiangte chuan criminal law pathum sorkar laipuiin a duan tharte chu July ni 1 atanga Mizoram Police ten an hman ve theihnan nasa taka an inbuatsaih thu a sawi a, Mizoram Police-te training pe turin NCRB atanga trainer an chah chhuah thu leh District hrang hranga Police Officer-te chu training an lo pek lawk tawh thu leh training pe thei tur mi 100 chuang an neih tawh thu a sawi a, Mizoram Police za a 80 te chu Criminal Law duan thar chungchangah training an in pek vek tawh thu a sawi.

Heng dan thar hnuaiiah hian Criminal Crime Tracking Network System leh prosecution, court leh prison bakah police ten case thlen chin an hriat zung zunga an inthlunzawm theihna atan Inter Operable Criminal Justice System buatsaih a nih thu a sawi a, hengte hi Mizoram Police Station zawng zawngah vuah vek a nih tawh thu sawiin pawikawihna lian thlenna hmun pawh video hmanga chhinchhiah vek a ngaih tawh thu a sawi a, hemi atan hian videographer ni turin Mizoram Police mi leh sa 257 te chu zirtirna pek an nih tawh thu a sawi bawk.

Inspector General of Police chuan dan thar hnuaiiah FIR pawh online hmanga thawn leh dawn theih a nih tawh tur thu sawiin online a case register thei tur Mizoram District 11 atangin Police 148-te zirtirna an pek tawh thu a sawi a.

Pu Lalbiakthanga Khiangte chuan Forensic Evidence Police ten an lak thiamna hun atan Sorkar laipuiin India ram state tin a Police-te kum nga chhung hun a pek thu a sawi a, Mobile Forensic Vehicle pawh Mizoram District tina dah an tum thu sawiin tun dinhmunah District pali-ah Mobile Forensic Vehicle-a awm sa thu a sawi a, Forensic science laboratory lam pawhin tun thla chhungin mobile forensic vehicle 10 pekchhuah an tum thu a sawi bakah training pek kawngah pawh Mizoram forensic Science Laboratory te nen thawh ho an tum thu a sawi.

<><><>

LADC

Lai Autonomous District Council hnuaiia Village Council 99 inthlanna leh Lawngtlai Chandmary MDC bye-election atan June 27 khian mipui ten vote an thlak dawn.

Inthlan hun tur leh tul pawimawh dangte chu nimin khan State Election Commission, Mizoram a Commissioner Pu Laima Chozah chuan DC Conference Hall, Lawngtlaiah a puang a. Inthlanna muanawm leh felfai a awmtheih nan inthlanna buaipuitu, Political Party te, Media, Tlawmngai pawl leh mipui tawiamna a ngen a, mipui duhthlanna kaltlanga inrelbawlna tha tak a awm theih nan theihtawp chhuah theuh tura sawmin, tun thla ni 27-ah vote nei ten thlak vek turin a sawm bawk a ni.

LADC hnuai ah hian Village Council 99 awmin General Seat 496 awmin Hmeichhe tana seat hauh 99 nen Village Council Member 595 thlan chhuahtur a ni a. Lawngtlai Chandmary bial MDC Dr. Lorrain Lalpekliana Chinzah chu MLA a thlantlin a nih hnuah Chandmary bial hi a chhuahsan vanga By-election neih ngai a ni.

Village Council leh MDC By election atan hian chuhtumte tan tun thla ni 18 tlai dar 3 thleng hming a pekluh theih dawn a, hming peklulte chu ni 19 chawhnu dar 3 atangin endik a ni ang a.

Inhnukdawkh duh tan ni 21 chawhnu dar 1 thleng hun hawn a ni a, ni 27 zing dar 7 atanga tlai dar 5 inkarah mipui ten vote an thlak dawn a ni.

Inthlanthat ngai a awm chuan ni 28-ah inthlanthat a ni ang a, Village Council inthlannaa vote tlate chu vote thlak zawhah chhiar nghal tur niin, Lawngtlai Chandmary MDC bye-election a vote tlate chu thla thar ni 1-ah chhiar a ni thung ang.

Village Council inthlanna ah hian Ballot paper hman a ni dawn a, Lawngtlai Chandmary MDC by election ah vote thlak nan Electronic Voting Machine hman a ni thung ang.

State Election Commissioner Pu Laima Chozah chuan inthlan hun puan a nih tak vangin LADC huamchhungah Model Code of Conduct hman tan nghal a nih thu a sawi a ni.

<><><>

MIZOFED

Mizoram State Cooperative Marketing & Consumers Federation (MIZOFED) chuan an Annual General Assembly vawi 26-na chu nimin khan Synod Conference Centre-ah an hmang a. He hun hi Co-operation Minister Pu P. C. Vanlalruata leh Pu V. L. Zaithanzama, MLA (Aizawl West-III) ten an hmanpui.

Pu P. C. Vanlalruata chuan thusawiin Mizoramah Cooperative Movement hi tha leh chak taka kalpui theih chu nise ram siamthat leh hmasawn nan hmun pawimawh tak a luah thei a ni a ti a. India hmarchhak state pahnihah National Cooperative Development Corporation (NCDC) Office hawn thar zingah Mizoram pawh a tel a, chuvangin Mizo thalaite pawhin a hma aiin Cooperative Movement rawn tuipui a, eizawna tlak a ni tih hriain, NCDC-te kaihhraina hnuai ah Mizoram State-ah pawh Society-te tihchangtlung a nih deuh deuh theih nan tanruala tihtakzetna nen thawhho a tul a ni a ti.

Pu V. L. Zaithanzama, MLA pawhin thusawiin Cooperative Movement chu sorkar atanga tanpuina beisei lova mahni leh mahni intanpui thei tur an nih laiin Mizoramah chuan rin aiin a hlawhtling em em lo a ni a ti a. Tun hnaiah MIZOFED-in essential commodities-a a sumdawnaah hma a sawn chu a lawmawm hle a; Society hi company a nih loh avangin cooperative principle kengkawh chungin thawk zel turin a chah a ni.

MIZOFED Annual Report tarlan danin tun dinhmunah thawktu 171 neiin sumdawna hlawm lian pathum (3) kalpui mek a ni a, chung atanga kum kalta 2023-24 chhungin MIZOFED-in hlawkna (net profit) a hmuh zat chu cheng vbc 1 nuai 68 sing 2 a ni.

<><><>

AP CM

Telegu Desam Party Chief Nara Chandrababu Naidu chua Andhra Pradesh Chief Minister atan vawiinah laklulh a ni dawn. He hunah hian Union Home Minister Amit Shah leh sawrkar mi paiwmawht tak takte an tel dawn a. Chief Minister laklulh inkhawm hi Vijayawada International Airport bul Keserapalli IT Park ah buatsaih a ni dawn a. Pu Naidu-a rual hian TDP, Janasena leh BJP hruaitute Council of Ministers atan laklulh an ni dawn baw k a. Prime Minister Narendra Modia pawh he hunah hian a tel dawn nia thudawn a ni.

<><><>

ODISHA CM

Senior BJP leader Mohan Charan Majhi chu Odisha Chief Minister thar a ni dawn. BJP legislature Party chuan kum 52-a upa Pu Majhi hi lungrual takin an hruaitu atan an thlang a ni. Pu Majhi hi Odisha ah hian Keojhar bialah tum li MLA ah thlan tlin a ni tawh a ni. Chief minister atana thlan a nih hnuah Pu Majhi chuan an state mipuite beisei ang ngeia tha taka thawh an tum thu a sawi a ni.

<><><>

MALAWI VP PLANE MISSING

Malawi Vice President Saulos Chilima chu thlawhtheihna chesualah a thi.

Thudawn danin he thlawhnaah hian Malawi Vice President Chilima bakah hian midang pakua an chuang a. President Lazarus Chakwera office thuchhuah danin thlawhna bo hi Malawi Defence Force te thlawhna niin Thawhtanni khan an khawpui Lilongwe atanga thlawk chhuak a ni a. He thlawhnaa hian kum 51 a upa Vice President Chilima bakah hian a nupui leh midang pariat an chuang a. A thlawhchhuah atanga minute 45 hnua Mzuzu International Airport-a tum tura ruahman chu a chin hriatlohin a awm zui a. Thlawhna zawn hna hi ngawrh taka thawh nghal a ni.

<><><>